

浮

溪

集

開化圖書館

Washua Library

八

開化圖書館

Kaichwa library

浮溪集卷二十

五言古詩

陳古四首

相士如相鳥

言當堂公

開不身人

論人未假

世學如大

開化圖書館

Kathua library

宋

撰

區劍為法徒誠此與魏八

許高語受之不復疑知人

水鏡鉛粉徒自欺就為仁

作思與有職期

勢易發機非時勞於整又

開化圖書館

Kaichua library

浮溪集卷二十九

宋

汪

藻

撰

五言古詩

詠古四首

相士如相馬滅沒深天機區區銅馬法徒識牝與驪人  
言當塗公惡人知其微如何許邵語受之不復疑知人  
固不易人亦未易知媼妍在水鏡鉛粉徒自欺孰爲仁  
義人未假已不歸伯樂不可作思與曹瞞期  
世事如大弩人若材官然乘勢易發機非時勞控弦又

如大水中置彼萬斛船雖有帆與檣亦須風動天不見  
周公瑾弱齡已飛騫不見師尚父鷹揚在華顛彼非生  
而材此豈晚乃賢茲基喻智慧要必有待焉嘆息狂馳  
子嘗爲愚者憐

崑山有璞玉外質而內美惟其不自衒故與頑石齒和  
也速于售再獻甘滅趾在玉庸何傷惜君兩足耳

堂堂明堂柱根節幾歲寒使與蒲柳同扶厦良亦難我  
衣傲緼袍我飯苜蓿盤天公方試我劍鋏勿妄彈

題張公明賞晴軒

只將春睡賞春晴東坡詩也  
取以名軒公明文定之孫

開

端居有何好名與勝會并人生豈長閒天宇不屢晴  
邂逅風日佳一醉萬事輕君家大父客詩如九韶鳴  
浮春散無垠攬取造物驚坐令綠野堂岌業睢陽城  
風流被三世諸郎未慙卿開軒著尊酒報答千花明  
飲罷遣客休仰空看雲行是中有佳處遑恤身後名  
寧爲秋雨歎更作秋蟲聲

題折樞密葆真草堂

軒冕有何樂書生分尤慳都盧百年中強半墮險艱能  
著屐幾兩恨無茅三間儻非身世忘那得方寸閒不見

葆真老功成髮毛斑飄然日邊來復作畫掩關所至書  
滿屋鈿黃不停刪開窗尋丈餘要看湘南山夕待明月  
至朝期白雲還醉吟如樂天但少素與蠻嗟哉道脩阻  
無由結朱顏惟應夢見之千里同躋攀

泊召伯埭

孤舟渺無根夜歷數村雨今朝亂晴景水鏡寫霜樹哀  
鴻念羣聲正到客愁處男兒有懷抱何事亦關汝蒼煙  
接牛斗惘恍迷歸路明發問吾儂乘流去復住

尤袤大暑留召伯埭

開  
Ka

陸伯焜校

清風不肯來烈日不肯暮平生山林下散髮頗箕踞一  
官走王事三伏在道路我非褊穢兒亦爾困馳騫居然  
戀俎豆安得免羈馭區區竟何營汨汨此飄寓淵明應  
笑人有底不歸去

大熱行旌德山中不可車馬步至凌氏林亭詩

踞石休鬪足掬泉洗頰容于何脫冠履共指雲外峯翳  
彼園屋小鉤簾蒼翠重庭空燕雀乳樹老莓苔封露泣  
過牆竹風淒橫澗松欣然曲肱臥鼻息春醅濃推床上  
馬去孰是陳元龍

次韻周聖舉從子乞紙

溪翁搗冰時寒甚龜手絮千金售詞客妙語零唾霧回  
看烏絲欄一嫡輕百庶長供蠹尾落肯受蠅頭汗今朝  
持贈君真似翼傅虎應緣未給札欲草子虛賦他年五  
十萬渠復願鄰富行看醉帖來家不設寒具

鄭固道累書求寓屋詩走筆封寄

平生金石交政爾一固道佳哉固道乎所至卽爲寶人  
言醒而狂我見影亦好憶初烟塵飛環壘十萬竈夕峰  
通甘泉兵氣塞穹昊公爲魯仲連麾去如振槁功成拂

開

衣去不羨中令攷每逢泉石佳便欲事幽討晚行龜峰  
旁愛此千嶂抱亟營背郭堂羞作出山草慨然懸其車  
避俗長卻掃所嗟高明家華屋幾人保旣留楊柳枝仍  
占杏花島真成醉吟翁何況無病惱屬聞鴻冥冥痛恨  
歸不早何當釋羈囚把臂共傾倒餘光玩桑榆踵息養  
黎棗買鄰會有時來往成二老

題伯禹給事漫吾亭

人生天地間同一幻泡影偶然相值過便有人與境那  
知兩皆漫直寄彈指頃古來賢達士物我均土梗程侯

東南俊少日忠義秉周旋正色地四海憚嚴冷立朝二  
十年憤世欲生瘦班雖近日月志則在箕顛中年拂衣  
歸絕意向鐘鼎擇幽成小築勝會已獨領清寒挹湍瀨  
秀色攬諸嶺聊將不羈身對此無闕景回首浯溪老便  
覺加數等從渠春風顛那得到古井高詞出胸臆妙處  
如灌頂讀罷眷樊籠悠然發深省

次韻趙叔問侍郎送曾吉甫學士按刑淞右篇末

見及之作

我老不足惜餘年苦忽忽願爲名山遊何必問所終一

關

儼若溪櫂星杓幾回東長年秋雨邊醉臥聽船篷故人  
幸弭節相見宿昔同酒酣說經過授我書一通云自天  
末至諸賢盛游從臨分出新詩句法何春容凜若臨大  
敵誰能觸其鋒攜持數千里不愧行橐空篇末亦及予  
依依古人風讀罷百憂失衰顏爲成童歸來北牕下自  
寫團扇中君方著繡衣行佩金印重朱絃付君賞寧循  
牙曠聰我病擁僧衲深慚服非衷還觀了無取此意何  
當蒙心知坡陀卑難並衡霍崇尚喜盛山卷兼收醉吟  
翁他年定撫掌秋蛇間雲鴻

次韻周聖舉過蘇次元四首

往聞蘇趙公黃閣望諸老功名四夷知無愧越裳操同  
時卿相家統緒或傭保至今子孫賢庭有書帶草

世人如冰蠶不知天有暑紛紛謗傷兒寧識真實語當  
家勤采穫兩耳得韶濩要須追此公勿問燕與許

蘇郎年少時萬象愁雕鐫應知等兒戲區區止啼錢三  
生綺語習一悟心超然胡爲作解嘲切切相悲憐

吳兒雅多姿不肯藏白地因君更增情吹雨作春淚三  
年師命留千日中山醉一聞高唐賦令我有仙意

開

藻蒙叔雅祠部重九日惠花惠酒惠詩繼爲袁家  
渴銛鉅潭之遊因循不能答再承佳句見寄今用  
來韻率課一篇參陪杖履之勝幸一笑而去之以  
覆醬瓿而作紙紮也

秋風入瀟湘千嶂倚天外使君挽蓑翁行樂秋色界放  
船下空闊舒笑鳧鷖會永懷愚溪人千載有遺愛延緣  
訪遺跡佳處時擊汰飛沈各獻狀領略在我輩忽忽莫  
能數頗似慰無賴孟行未云半落日已相對歸來有酒  
所方省欠詩債朱輻幸停軫嘉汝山水最金莖峙霄漢

行矣分沆瀣何妨共流轉今古同一概非君箇中人孰  
使此中大伊余漂泊者他日名亦在一聞欵乃聲蓬華  
忘湫隘

從穉子出前溪

霜斂萬壑淨鐘鳴空楚山夕陽當我沈風煙迫梅殘西  
嶺月未上數峰深作寒枝間鳥競赴亦復循溪還

同張昌時宿高明寺

幽臥不知覺牕懸寒日初矧伊夜來雨谿聲到吾廬故  
人挽我出忽枉天際書躋險敢自休青山轉籃輿相逢

開

竹間寺共擷園中蔬殘僧誰在亡奄忽十載餘茗果話  
疇昔新晴報鐘魚東雷亦已鳴百草茗穎舒奈何與之  
子齒髮日夜疎眷此不能發牽衣更躊躇明朝各回首  
世事將焉如

孫益遠試歸墮車敗面已而薦書至作詩戲之以  
送其行

羊公作三公政辦一肱折功名方鼎來詎嘆養生拙孫  
郎少奇偉面滿若霜月胡爲忽顛墜有物食之缺寧非  
造物意怪子臥巖穴長年臉邊紅漫自供酒纈顧令冠

蓋底未省識此傑何妨暫相顧一訪唐舉決朝來清鏡  
裏黃色兩眉微居然萬馬羣老驥已超絕聊將釣竿手  
遮日向西闕瓊林風帽穩醉度櫻筍節從渠關宴上兒  
女笑醜蔑誰能爲公豪玉琢揮作雪

徽州班春古巖寺呈諸僚友

揆日奉明詔班春出孤城和風遞鼓鞞細雨迷旆旌渺  
渺度阡陌谿山照人明幽花不孤芳好鳥相應鳴隴麥  
已爭秀畦秧亦微萌食新知有期及我凋瘵氓古寺依  
絕壁林端列飛甍殘僧四五人靜若無所營石室廣百

開

肘嵌空自天成泉甘與茶宜就挹巖下清伏檻肆遐矚  
歸雲入簷楹數農前致辭貌野意則誠茲幸枉冠蓋使  
君豈無情頻年苦飢虛奚用恤此生守昔在閩里先疇  
每躬耕起家三絕餘謬忝符竹榮無術布寬大低頭愧  
鯨惇願言同撫綏永絕愁嘆聲

阻溪漲宿諸暨縣上省院

暑濕倦行役依投得禪關空堂納清風坐見香霏還積  
水共天遠高僧與雲閒傳聞扁舟人宿昔廬茲山姝者  
已千載諸峰高煙鬢當時功名成止在談笑間今豈無

國士宸遊一何艱憑高望行朝小雨猶斑斑

試闡同宋德操陳純中登稽古閣曉望

雙睫不能熟疎鐘起初曉危欄扶力上層簷掛雲表羣  
峰蒼玉如開簾四環繞向來聲利場自今眼界小兩君  
天下士一見意傾倒有此風味佳未受秋思惱我昔溪  
上住盟言寄鷗鳥今年縱得來官事閒日少樊籠更樊  
籠歸途天樣杳是處非不佳千慮舒懷抱浮雲且東來  
吾家隔林杪境熟斷難忘終念今朝好

芳美亭

開

東風不世情幽谷渠亦至誰分立都種爲我作春事朝  
來花氣煥詩眼先自醉祇愁貪結子零落煙雨際聞今  
新蹊成有酒且頻置

十月二十六日會于北禪分韻賦詩應辰得多字  
呂治先酒熟亦欲會客故末意及之

爲此升斗粟來往如飛梭桂林在何許水險山嵯峩驪  
駒偶未至于焉少婆娑幸陪英俊遊不覺日月過今夕  
復何夕朔風捲寒波肴核雖草草聊以供笑歌子如不  
飲酒視此庭前柯濃綠光蕤蕤所餘今幾何鄰家釀新

熟頗聞旨且多更當奮餘勇往舉金叵羅

題葉尚書普光明庵

長樂七閩會山川富登臨重城十萬家問以煙樹林何  
許肆遐矚城西最高岑主人厭直歸與世相浮沈三宿  
得勝地八還見初心明窻一蒲團宴坐依橫參面面來  
遠色層層列清陰閉翻貝葉書靜聽頻迦音萬法照了  
處人居兩幽深嗟予晚聞道況迫桑榆侵如何結保社  
去脫頭上簪從公刮眼膜儻借篋千金

病中偶成

開

衰病乃其理移牀臥南軒雖懷飲冰憂賴有清賞存春  
去芳草積羅生滿庭萱花房向夕斂似與吾忘言數蝶  
亦多態差差傍叢翻客來同一欣何必臨芳樽常恐秋  
節至嚴霜實其根吾生尚悠悠眷爾安足論

再過凌氏園復用前韻

兒輩病元亮斗筭羈曼容何時跨鴻鵠食藕蓮花峯小  
檻再遊歷輕寒裘未重人家當卮黍不愧千戶封願因  
琴高生儻見喬與松從茲毀車馬永絕世味濃歲晚復  
來此清陰期籟龍

聚山閣爲吳氏題

緣江故多峰秀色無可揀何須著腳力政欲長在眼詩  
翁築飛閣似恨山意懶縱橫數州碧收拾付酒酸客來  
何所命濯濯千髻縮晴嵐入肺腑寶唾落碑版翁家誠  
可樂人境兩蕭散爐香侶趺坐終日對編簡風流前輩  
接細說鬚自挽居然典刑在聽者輒忘返會須營一壑  
萬事等鵬鷄從翁時對榻臥看煙雨晚

偶書

長簟北窗下拋書任縱橫娟娟穉篠上熠熠叢榴明眷

此感佳節怙然愴平生少年文翰場結客俱擅名瑤草  
俟采掇雲鴻肆遐征如何二十載日與憂患并骨肉隨  
逝水兒童長柴荆向來交臂人接武霄漢行姻親歲時  
會尊酒懷抱傾茲余豈復願顧影良自驚飛雨夜來急  
濤翻江上城田家夢亦好想像秋稼成新春了在眼續  
我齋庖清

吳傅朋以王逸少遺意作游絲之書古今所無恨  
未之見也爲賦此詩

吳侯能書聲不減銘瘞鶴臺郎今獨步誰數衛與索官

黃臨小楷老筆更沈著年來雞鶩間兒輩妄穿鑿超然  
出新意非用元和腳游絲隨春風忽向窓几落傳觀懍  
飛動安得此健藥自言臨池時屢閱更歲籥毫端幾百  
鍊始到盡網絡誰云右軍後茲事秘冥漠一朝神明還  
千載宛如昨乃知鑪錘妙信手皆合作於皇雲漢章神  
授等河洛光芒下照燭萬帖悉糟粕君命幸逢時當草  
鳳尾諾胡爲尚留滯未便持漢橐行看誠懸歸佳句題  
殿閣

書局晚歸

關

平生麋鹿姿不意華屋居一為軒裳搜所得非所如弱  
跡踵諸彥清班直周廬蓬山切星辰牙籤明綺疏散帙  
喜所得懷鉛愧中虛暝歸復奚營一飽不願餘寧甘四  
立壁懶作三獻書高槐障焞煩清陰落庭除幽臥遂終  
日茲謀定非疎娟娟新月流翳翳歸雲舒懷人發浩歎  
屏營以踟躕願言果歸志春波漲隋渠

次韻胡德廣書懷

大瓠既成實無用始欲剖鮒魚困車轍求活賴升斗我  
昔誦斯言感歎銘座右慎惜千金軀未欲聊俯就數子

磊落人好事真吾友相期竹西遊晚歲並耕耦如何窘  
窮途狺狺吠羣狗平生笑俗士反欲較妍醜譬如惡影  
人乃與影競走今復念邊陲未暇從田叟彈冠宜彙征  
于先我欲後世間檇與櫟拳曲自難揉

陪諸公遊文雅臺憩法雲寺

旅泊值秋晚登臨良亦佳高臺始基誰未覺歲月遐維  
梁漢寵弟非復孳附葭鳴鞭白雲上寶髻翻千鴉樽前  
第詞客坐使屈宋衙祇今竟何有蕪沒荒煙斜秦墟仆  
翁仲楚俗悲章華空餘古招提老龐伴丹霞花氣侵客

關

袂松聲滿鄰家  
淒涼劫灰地  
半似篁竹遮  
坐久鴈橫野  
炊烟映簷牙  
似聞睢陽曲  
尚作兒童譁  
惜無斗酒酌水  
厄空嘗茶

又

向來卜幽期  
此樂真雋永  
行尋野航渡  
俯玩雲水影  
追隨兩玉人  
妙語時灌頂  
平生訪古意  
到此方一騁  
所欣俱禿翁  
王事廢朝請  
且同陶淵明  
蓮社對宗炳  
晴軒納野色  
秋思浩千頃  
忽驚梨棗村  
身墮白鷗境  
飄零愜勝會  
老大惜餘景  
況當風露辰  
病鶴最先警  
留連淨名室

坐閱篆香冷還尋野田歸草樹斜復整有酒當再來悠  
悠詎能省

陪諸公遊惠山

茲山定中腴秀色乃如許連峰積蒼潤嵐氣亦如雨珍  
泉不浪出世俗那得取羣仙作佛供酒此玉池股甘寒  
飲天下瓶盞走膏乳兒嬉供茗事雲散入江渚當源起  
臺殿下瞰松柏古巍基首梁宋爽氣接吳楚我來值佳  
月濟勝得嵇呂聊分小蒼壁同振百年羽躋攀興未極  
落日在林莽卻立望翠屏中流駐鳴櫓

題通惠亭

吾山皆中腴初不斷地脉淄澠嘗同味十里何所隔幽  
居愁遠汲悵望懸瀑白天公眞解事分我膚寸澤無煩  
籀龍引中有玉池色煮茗聊餉君未須嫌水厄

從吳禹功借徐鉉小篆帖以詩還之

六書散浮雲篆籀世不數陵夷到草隸差別幾四五人  
皆逐曾立不復知父祖中間尤可笑雞鶩紛去取孰爲  
魯漆書況說周石鼓陽冰雖晚出妙意得千古後來繼  
者誰騎省人最許明窓出小軸驚歎手爲拊平生箏笛

耳慣見沐猴舞一登韶濩堂方信有干羽援毫極摹倣  
浣壁類兒女秋蛇已成癖老腕徒自苦卷書還歸公職  
自愧韓愈

食十月藟

佳藟出何許南山白雲根畦丁入雲採徧以脫葉翻戢  
戢寸玉嫩纍纍萬釘繁中涵烟霞氣外絕沙土痕下筋  
極雋永加餐亦平溫伊昔貴公子鮮肥厭羔豚爭啖肉  
菌美共品天花尊居然此珍產以遠莫見論坐令五鼎  
味但飽三家村伊余少所嗜頭白歸故園日獲甘脆享

開

人言老饕存枿脯固已陋竹枯何足言從今大嚼處不

復思屠門

蜀人以菌雜雞羊爲腊寄遠號枿脯陽羨三月有草出竹根正赤土人競食之曰竹枯草

寄余仲誠

千巖雪齊消煙日暖春事端憂昧佳節獨宿松下寺遶  
屋泉雨鳴焚香戶深閉殘僧荷耒出幽鳥下庭戲將期  
道心復敢愜棲遁志起望君家雲風清鴈成字

古鏡行

我有辟邪鏡得之咸陽宮其陰爲天池一母將九龍旁  
書負圖字土蝕如旋蟲緘以駭雞珍妙極倕之工請言

照遠近十里秋毫空豈不鑿脂澤所貴肝膽通問誰爲  
此器太古非人功客聞重歎息意欲窺靈蹤高臺不辭  
倚恐客難稱容繩窮匣半啓四室來悲風日車當晝留  
羞澀如頑銅森然髮上指凜若臨霜鋒我還撫客手此  
豈世寶同揮淚兩無言掩鏡鞞囊中

次高郵軍

小雨靜林麓鶉鴉相應鳴移舟漾清淺薄晚荷風生歸  
鳥盡雙去潛魚時一驚菰蒲若無人渺渺炊烟橫艇子  
檝迎我攜魚薦南烹月出殊未高疎林隱微明依投會

開

有處斗掛天邊城

避地山亭野步

今日幸無雨天空出遙岑行行不知疲遂至春江潄汲  
路轉離落人家在桑陰平疇漲清波隴麥如人深溝畎  
戲鳧鶩新蒲映浮沈我生本樵漁對此諧初心風物豈  
不好悲來自難任邊塵暗中原四海如驚禽黃屋狩萬  
里兩宮隔辰參龍移螻螳窺月晦蟾蜍侵宇宙有傾覆  
茲游豈嶮歛消憂賴濁醪太息誰能斟

庚午歲屏居零陵七月二十日以門揜候蟲秋爲

韻賦五首

幽人獨夜時潮落西川根渡口櫓聲急一江煙雨昏城  
頭短長更不寐聽譙門趺坐數千息焚香待朝暾

暑退潦亦收瀟湘淨如染時觀自跳魚衝破青琬琰纖  
織初弦月不受薄雲拚近村應漸寒已有鴉數點

人生幾聰明日夜隙駒驟纔經花信風又過麥秋候吾  
非金石堅與世相邂逅胡爲聞鐘鳴更歷路傍埃

家山在何許渺渺彭蠡東人來數月程衣敝補道中昨  
宵青燈花似墜釵頭蟲兒飢女沈繇歲晚書未通

開  
u a

人言間闊者一日如三秋孤臣昔放逐七見天星周早  
汚高門地姓名記前旒如何天雞星不照湘南州

關化圖

Warhua Library

館

ry

浮溪集卷二十九

開化圖書館  
Kachua Library

浮溪集卷三十

宋

汪

藻

撰

七言古詩

汴中放船歸陽羨

流嘶欲作環珮鳴  
枯木未肯回春聲  
舟人坐恐雪爲祟  
嬌鴉又舞天邊城  
天公知我不足厄  
乞與十日霜風晴  
遙遙煙堤護玉鏡  
泔泔雲海浮金鉦  
攬衣坐數踵間息  
闕見宇宙無餘情  
燈花也似調兒女  
咄咄笑我長宵征  
我生底處不堪著  
未歸且雜吳兒耕  
縱無鄰翁飲子美

會有稚子迎淵明仙山況聞連洞壑餌朮或可求長生  
閒中日月吾所有此外付之人重輕

送毘陵太守劉君受代東歸

往年我作新安民人人能說劉使君使君本一儒者耳  
數十年來嗟未聞我時屈指今州縣似此賢侯當識面  
那知漂泊千里餘晝戟清香日陪宴使君何以人不如  
胷中正有萬卷書清真簡淡乃天性文章政事猶其餘  
向來天子留君住重與毘陵三萬戶誰教一曲渭城歌  
忽作梨花枝上雨宦游南北安得同撫循涇郡還須公

關槐

人生五馬亦不惡與民處處爲春風

題孫益遠三士堂

取東坡三士圖身與淵明稚川爲三也

稚川晚作羅浮遊淵明暫出還歸休東坡百謫乃欣慕  
孫郎更欲參其流四人出處無一似千載相期風味耳  
要須共著巖壑中應只虎頭知此意

從人乞酒

張侯表表霜松立嗜酒清狂餘故習長年種秫學淵明  
門外溪流和月汲手調溪上百花乳十日煉成冰雪汁  
糟牀夜聽秋雨注詩腸曉放春風入飽聞誇說未曾見

但笑書生便飲濕爾來消渴臥江海更似枯魚過河泣  
傾家餉客古人事坐看兵廚千斛給那知日飲無骨相  
咫尺公榮殊不及西風昨夜到林杪左手蟹螯行可執  
新醅早晚定堪斟凍蟻浮缸應戢戢心知問字寂寥久  
會遣鳴鞭馳送急呼兒洗盞酌先酒爲君快作長鯨吸

過吳明叟新居

誰開大屋沈沈者門外垂楊拂車馬主人四十持節歸  
高臥綠陰啼鳥下冥冥一徑傍花入忽有清池照深夏  
魚吹落日知鏡淨荷受微風看珠瀉夫君少有湖海氣

關

欲駟長鯨無地跨故將能事驚世人坐向雲端差萬瓦  
稍培幽桂出牕底時放青山來竹罅人言此興極不淺  
天遣公忙那肯赦要須更作輞川圖他日思歸聊對畫

次韻周聖舉清溪行二首

君不見國家有紀狂童干一溪百繞山千盤竹兵草草  
兒戲爾震澤以南心爲寒初如妖禽嘯月曉忽作聚蚺  
奔醯酸九重夜半出秦甲一麾萬里春農安書生那知  
破賊事且復雪涕論悲端憶初倉惶挺身走江湖滿地  
皆驚湍仲宣何暇守漳浦子美僅能投錦官朝愁烽連

海嶠起暮恐彗掃星河翻忍飢怖死頭搶地破釜躍魚  
苔漬冠爾時身世狹于掌俯仰宇宙何時寬只今同喜  
風塵定慎勿忘憂耽酒聖要須剩作春陵行爲洗吳兒  
百年病

君不見吳儂自昔王江千歲輸御府金堆盤一朝肘掖  
作奇禍玉冊錦袍盟欲寒驛塵初飛梅未破怒怒煙雨  
催梅酸行驅鬼馬載鬼妾欲偷瞬息如槐安那知氛霧  
卷清晝旄頭夜落天南端樓船千萬羽林卒飛渡海潮  
江不湍狂童生致獨柳下請肉仇家來自官千奴一膽

更須問速收兩手春耕翻鹿奔誰云爭走險雞敗但笑  
空餘冠政須舡粟哺其腹此令朝行民夕寬功歌九廟  
今誰定退之方頌元和聖老人端坐聽清風習習先秋  
蘇肺病

題周彥約壺齋

化人謁帝遊清都俯視宮室如積蘇那知神仙隱朝市  
雲窻霧閣在一壺古來志士守環堵宅彌萬里乾坤俱  
君今官冷百僚底世人未識文與菟故營容膝尺度足  
卷藏風月吞江湖客鄉筆墨共遊戲維摩牀坐同跏趺

鈞簾終日屏塵事臥聽秋雨鳴菰蒲伊余想像未得往  
一讀妙語清而腴遙知坐穩肉生髀滿壁但掛歸來圖  
功名富貴會相迫恐此骨相山林無平泉綠野看他日  
莫忘築室愚溪愚

觀秋江捕魚圖

霜飈落木瀟湘秋黃蘆颯颯秋江頭漁翁短棹搖輕舟  
夕陽斜照寒波流篷蓑箬笠興夷猶得魚沽酒更勸酬  
生涯一葉水上浮市朝利病不相謀青山綠水得魚游  
此樂未必饒公侯畫圖忽見清兩眸恍疑身在滄浪洲

關

年來萍梗歎滯留擬欲與子爲朋儔

何子應少卿作金華書院要老夫賦詩因成長句

一首

詞林根柢須人品四海聲名誰藉甚金華真是第一流  
好泛扁舟著宮錦向來奮舌動天意不怕惠文霜凜凜  
忽然飄落九疑山坐對秋風行兩稔手栽岩桂友羣石  
收拾清香供燕寢笑隨蠻俗且南冠忍說鄉關猶左袵  
人間何事非戲劇鶴有乘軒蛙給廩功名入手談笑間  
誰謂收之如拾瀋況君風骨未渠艾意氣文章天所稟

我今頭白奚所爲柏樹誰知問從諭雖云百里間何闊  
同在邯鄲一羈枕遙知袖手正書空讀罷離騷還痛飲

蜂兒行

土人謂之霜蜂

蜜蜂以蜜爲生涯爲人採蜜安于花霜蜂嘗恐奇禍作  
深崖大壑懸其家生兒孚乳自毫末幼成玉蛹肩相差  
分房戢戢蓮綻子擁戶娟娟蘭茁芽驚猜肯使樵牧近  
千尾負毒爭防遮那知長安貴公子酒酣咀爾不搖牙  
登盤未辨翅與股百金購買囊紅紗琴魚漫傳仙物美  
桂蠹空取蠶方賒吾聞厚味古所戒暴及胎卵寧非奢

關

合圍火攻無脫者舉族孥戮奚罪耶厥包作貢自誰始  
從今可弔不可誇

阻風雨辟邪渡寄王仲成

渡頭急雨鳴森水木杪顛風飛大屋沒腰寒水稻生芽  
滿眼青泥車折軸山行值雨舟值風窮愁日日煩天公  
不如歸臥澗壑底世事一掃春花空別君兩年重此別  
喜君胸次渾冰雪擬將身作賈胡留無奈東如空鳥滅  
挽我不回君怒嗔交情把玩轉清新相隨百里還相見  
只有西山似故人

贈丹青僧了本

虎頭不復傳金粟魏武之孫聊可續如何三昧畫中王  
解使天機照人目含毫不動先有情萬態了了隨經營  
偶然得意灑春色日輔月角須臾成精神還仗精神覓  
筆下區區徒刻畫故知巧匠盤礴時萬里丹青減容色  
君不見齊梁大士天所開幼僧不許僧繇猜師今幸有  
印泥手貌取當年黃面來

題楚東吳文學湖隱閣

君不見三峽濫瀕瞿塘堆盤渦日夜轟春雷又不見洞

關

庭周遭六百里日月出入其灣隈人間偉觀有如此欲  
往莫到空低回如何湖光几席上萬頃鏡淨無纖埃桃  
花雨餘春漲急益益正作蒲萄醅菰蒲遠映水一碧五  
月菱熟芙蓉開冰輪宵向座隅湧四座林影參差來天  
寒潮落洲渚出健步更宜尋野梅吳郎一生短檠下裏  
以章服羞自媒家山故有丘壑在松竹多是兒時栽中  
年有得雲水趣深入鷗鳥無驚猜坐令浮念掃除盡方  
寸淡泊寒如灰浩歌時從鼓枻去高臥不怕當關催鑑  
湖賀老卽君是定與謫仙長舉杯

次韻蘇養直寄黃元功

男兒當騎生馬駒不但詞賦凌三都願從北地傅介子  
西吞青海東元菟一行作吏不稱意人間險過宮亭湖  
黃郎里中同隊魚十年太學隨諸儒春風不作霄漢夢  
秋雨漫肥瓜芋區一身長寄白鷗境千字快掃青松腴  
風埃空憶大梁別尺書不到雲泉居似聞騏驥尙伏櫪  
飢鷹未飽誰能呼清江上有仙人廬何時十幅西風蒲  
與君杖履日來往濁醪可解飢寒劬

次韻劉立道二首

關槐校

劉郎有酒君當傾，安用新詩鳴不平。  
黃梁未嘆轉頭熟，朱絃卻喜知音明。  
古來去國例憔悴，伊余尚得佳山水。  
謝公行處欲千年，擬傍蒼崖尋屐齒。  
揚帆今向古長干，渡口遙知儂戲官。  
此行相伴只明月，到時破壁應團藥。  
羹尊飯稻江南俗，剩鱸銀絲炊白玉。  
人間墮甌萬事休，臥看雙溪千頃綠。

雲花忽作按雲傾，臘梅便欲迎嘉平。  
青燈已照浪頭宿，夜長更苦風連明。  
榆黃柳綠已衰悴，空餘疎星漾寒水。  
想君懷抱亦凄然，況我飄零誰復齒。  
不須聞此涕闌干。

人今得歸仍得官未應百鍊遽磨滅他年尚識霜鐘藥  
心知簿領令人俗賴有煙波雙屬玉長沙縱使賈生歸  
只恐樽前凋鬢綠

次韻過顧子美話舊因遊惠山

放船山郭溪渾渾乘潮夜到君家門潮頭細卷落花雨  
濕櫓不驚春夢魂君家難忘復易識依然井徑當丘樊  
向來惡子下闕處繞屋但見清陰繁飄零懷抱少傾倒  
一見故人如故園嗟予何因得之子舊事請自鍾陵論  
鍾陵當日盛游集往往前輩風流存嘯歌雖容阮籍逸

關槐

人物不數王融，諼我時三十。君始壯矯矯，兩鶴俱乘軒。  
大兒洪徐小兒向，此外餘子何勞吞。龍沙買酒醉秋月，  
倒牀但聽長江奔。祇今相去能幾日，世事反復那勝言。  
一官得謫大如屋，五年乞米供朝昏。頗疑造物乃知我，  
欲使晚節窮彌敦。君看靜躁不同者，王孫顧肯還爲猿。  
飲酣起步青松根，共瞻佛宇諸峯尊。席邊政喜泉漱壑，  
風外已復鳥啼村。箇中好著我輩人，寄與石上留窪樽。  
以詩酬答贈小姪

老奴攜簡來林泉，蒼然白髮垂枯顛。自甘老矣填溝壑，

那識人間有地仙小賤微意我所喜扁舟便可來山前  
輕帆破浪有清思況是暑月開紅蓮塵緣萬事不足理  
且欲一見增欣然

石舟嘆

怒怒負鍾鵝鷺喧閃閃蹴車雷電翻一城騷動急星火  
官渠底用農時穿海神有意驅巨石風伯不肯停陰雲  
坐令榷水甚于酒盜者以乏軍輿論峩峩之山載大編  
所過郡邑千官奔繡衣持斧坐堤上百瀆倒盡生龜文  
民間四月種不入敢惜數斗春泥渾君王神聖古無有

關

談笑坐可回乾坤何妨罄欬九天上叱散黃帽還嵌根  
嗟哉食肉胡不告勿謂石也安能言

次韻賈仲遠還浮溪猥藁之什

我家浮溪溪水頭一褐一裘聊玩世誰教去踏曉鼓朝  
也學兒童攻偶儷憶身曾是掖垣客歲晚猶期樂天似  
兩年漂泊萬里餘老矣始于魚得計欣逢賈傅古湘口  
城郭雖非人物是連臺拘倒時一醉醉後還爲五禽戲  
慙慙爲我出新詩金石因聲泉湧思年來處處飽葵莧  
染鼎忽驚嘗異味荷花開已三四紅有酒無過行樂耳

與公同嚼三百杯莫負便便五經笥

卽事

前瞻西嶺懸日光回望東崖森兩行天公作事銷底力  
投壺一笑千家涼初乘青駛度平野稻花風露隨人香  
忽驚強弩過林杪羣山發盡煙復藏宮廚蔗漿若可挹  
炎官火傘那復張夜寒更踏松桂影馬頭新月明于霜

次韻董禹川餉墨

徂徠老松蔽百牛輸膏販乳來中州何人夜半擣寒碧  
用心獨與神明儔籠成秋天翔紫鳳裁作古虛懸蒼球

匹夫被褐知者少江都老相千金收養之懷袖作歎息  
平生長物胡爲留分張好事亦及我摩挲未語心先謀  
明光起草正須子一揮坐遣千人休嗟予老矣安用此  
誰能細字書蠅頭

五言律詩

汴中書事三首

永日鈎簾坐乘流頗自怡手邀飛絮住目送遠花移官  
牒吾何有郵籤汝漫知關心淹速事無復少年時  
旣雨堤仍注無風浪更揚麥登孤市沸榆老半川涼擊

汰吳濃勇傳擷楚戍荒祗應今夜月兒女話他鄉  
曉日輕橈動波光滿座隅岸遙雙燕去天霽百禽呼衰  
白看明鏡飄零倒濁壺長年作羈旅三徑有人無

題余氏幽光亭二首

縹緲風煙上誰栽柏滿庭諸郎渾玉雪前哲想丹青舉  
國思人鑑重泉揜德星空餘千載事寒露泣秋螢  
自奪幽人去江山勝氣無祗今埋宿草誰復奠生芻滿  
世儒冠寵他年史筆誅未應丘壑底遺恨失金朱

常山道中聞諸將屢捷

關

一雨四十日義和安在哉路憂石頭滑雲怕天心開隔  
水喚舟渡逢人騎馬來聞言江北好一笑爲傳杯

己酉亂後寄常州使君姪四首

汾水游仍遠瑤池宴未歸航遷羣廟主矢及近臣衣胡  
馬窺天塹邊烽斷日畿百年淮海地回首復成非  
草草官軍渡悠悠敵騎旋方嘗勾踐膽已補女媧天諸  
將爭陰拱蒼生忍倒懸乾坤滿羣盜何日是歸年  
身老今何向兵拏未肯休經旬甘半菽盡室委扁舟台  
拆星猶彗農飢麥未秋日邊無一使兒女詎知愁

春到花仍笑時危笛自哀平城隆準去瓜步佛狸來地  
下皆冤肉人間半劫灰只今衰淚眼那得向君開

次韻桂林經略李尚書投贈之句三首

方隅謀帥重帝豈賈生疎絕域須高枕中朝輟引裾邊  
城雄鼓角幕府省文書暫作驂鸞去羣公歎不如

東越更新組南陽別舊廬中原猶鐵馬遠使只銅魚荒  
俗宜深問遺蠻勿重耒歸來正黃閣將略自公餘

聞道中興帥今除第一流犬牙聊制敵猿臂卽封侯把  
酒逢元亮哦詩得子猷何妨留此傑相與復神州

關

次韻蔡少張遣興四首

南紀安耕鑿平時不受兵邊陲忘宇覆江漢忽塵生潮  
卷妖星落春歸玉帳明將軍談笑事一笥定聊城

聞道官軍入吳儂盡倒戈指揮移地軸湔洗用天河尚  
作蒼頭起當如赤子何汝曹宜面縛環壘卽恩波

欲弔沈冤處春江只自深鋤耰元聚守塢壁要先侵吉  
語行看報窮愁有底禁簷花應好在準擬報同襟

坐奪江山險都忘帶與襟不應囚膽落亦費廟謀深賸  
作懷歸雅行參解慍琴君王憐赤子意豈在南金

次韻鄭固通侍郎見寄長句二首

一作班荆別秋風幾度涼論文隔尊俎得句夢池塘歲  
晚思傾蓋情親此陟岡若爲生羽翼千里到君旁  
憶昨遭戎馬同浮十里江括囊聊遜世懷寶豈迷邦眼  
底雲空過眉間雪未厖不因參嚼蠟那得寸心降

舟行遣興五首

擁衲無餘事時聞起柁聲水煙猶作暝霜鵲已嬉晴  
森人歸路悠悠歲晚情祇應江海外隨處著餘生  
滔滔千里浪祇解送人忙看卽成衰鬢能堪幾斷腸繫

關

船冰樹動炊黍水雲香驚怪陶彭澤功名晚更忘  
高城吹角罷別浦載燈歸歲晚客猶去水寒潮亦稀一  
身將影屢萬事轉頭非莫倚危檣望清霜易滿衣

霜斂初晴夜江愁獨望人蕭條全浦暝錯落數星陳老  
覺癯儒冗窮遭醉尉嗔梅花行滿眼莫作後園春  
渺渺竟何向滔滔難與論鴈書鳴笛野雪縞過帆村夜  
寂人誰語江流月自存莫令漂泊夢千里到脩門

過臨平二首

一別九霄路風煙長滿衣已成身老大無復世輕肥天

關鳥雙下山寒人獨歸曉來何似雨春水半巖扉  
睡起涼生岸鉤簾坐小窻麥風能起柁梅雨不鳴江往  
事心長折歸塗影自雙依然蒲柳地人老故先降

天長道中三首

山行逢淺夏濃綠屢低巾地冷猶衣袂村香已食新菰  
蒲渾欲老魚鳥自相親倚杖看孤月悠悠何處人

十年遊歷地客子故難忘下馬尋遺老開門對夕陽一  
鳩鳴晚翳數犢臥蒼茫更欲東南望疎星近鳥行

節物兼暄暑川原半雨晴雉場時一雉鼃畝忽齊鳴斗

關

粟違高枕囊衣度古城讀書成底事投老失春耕

水晶數珠詩

猶帶他山潤來依宴坐深誰云秋露滴能節海潮音積  
數塵難盡微穿蟻可尋但隨君語默用舍我何心

食蝦

久憶南京好今朝放筯空短箱傾碎碧纖指剝輕紅腰  
折宜賒死鬚長不療窮吳兒方獻納應與鱉魚同

山奧寺

已怯驚潮渡還憂複嶺登逢人多問數投宿只尋僧野

飯農夫怪山行稚子能朝來那得爾前路好飛騰

悼往二首

宿草縱橫綠春歸有底忙百年知有盡萬感要難忘欲  
語如他日猶疑在我旁人生今至此不擬惜流光  
意懶還須步愁多不更嗔蕭蕭寒著樹咄咄老侵人未  
滿窮愁願先分夢幻身東風吹節換送我淚痕新

起居方舍人挽詩二首

嚴陵人

漢殿臚傳處回頭四十春共嗟香案吏歸作釣臺人意  
氣林泉老名聲日月新賈生方擬召鵬鳥在承塵

開

經術羣公上人材二紀間屢持邊使節竟老近臣班賜  
第叨同擢趨朝憶共還白頭無力送能隔幾青山

河中使君莫少卿挽詩二首

子儔廷  
試第一

表表今詞伯邕邕古德人翱翔初畫省邂逅老朱輪閱  
世深涇渭傳家得鳳麟懸知他日大時望屬平津  
藉甚河中守宜簪近侍冠九霄卿月墮四海德星寒桂  
籍新枝大蘭陂舊馥殘空餘尊鯽奠鄉淚滿江干

挽毛奉議詩二首

不信儒冠誤長年自濯薰鄉評推秀孝墨客誦詩文仕

早收朝蹟材終壅上聞晚全冰壑趣造物似知君  
玉立簪纓底平生恥自媒次山初漫仕元亮卽歸來竟  
老金閨籍虛纏蕙帳哀盛名知不朽妙語寫瓊瑰

致政魯奉議挽詩二首

澤國今耆舊于君見典刑居鄉乘款段生子得寧馨綵  
服供春酌銀章慰暮齡誰知雲霧裏忽失少微星  
詔綽從君賜經龕與佛同早霑三釜祿幾作百年翁閱  
世松成蓋傳家桂滿叢素車千兩送榮絕九原中

魯國太夫人楊氏挽詩三首

朱勝非  
丞相母

關

有子升台袞承顏況日長魚軒開大國鶴髮老高堂忽  
報栽萱隕空餘扇枕涼他年黃閣地誰舉伯仁觴  
白雲終日望方喜見庭闈鼎食三牲養貂冠五綵衣回  
班儀未舉反哭事俄非寂寞苕溪路安輿去不歸  
承顏雖一子扶膝有諸孫壽祉膺難老哀榮動至尊祇  
今懷顧復猶想對平反天與牛眠地何須返故園

隆祐太后挽詞二首

慶源由魏國奉祀及宣仁盛德儀中壺私恩絕外親長  
秋期不老厚夜忽無晨來歲柔桑綠誰臨繭館春

朔漠遐征後南州倣擾時人心憂社稷天意屬簾帷擁  
佑千齡主圖回萬世基中興能事畢倏與帝鄉期

浮溪集卷三十

關 槐 書  
K. a. r. u. a. l. i. b. r. a. r. y.

浮溪集卷三十一

宋 秀 汪

藻

撰

七言律詩

湖州長興縣大雄寺陳霸先故宅天嘉中所植檜  
柯葉蒼然其中空洞皮脈僅存而已

曾經浩劫故依然老壽方知木有仙直榦凌空裁百尺  
虛心閱世已千年深蟠澤國興王地獨傲天公造物權  
玉樹庭花非不好祇今誰占舊山川

韋氏獨樂園

渺然于世不磷緇手自栽花作四時坐客聽蛙聊復爾  
呼卿聞鴈汝爲誰眼中泉石輪溪買行處壺觴逐境移  
早晚拈書來就賣別開三徑與君期

宿東山寺有謝公井存焉

謝公當日此徜徉千載空餘一徑荒林壑久應無小草  
石泉今卽是甘棠江山似恨功名誤花竹猶含笑語香  
投老西州知不反可堪垂涕笛箏傍

次韻李元亮

水宿山行十日歸李侯應恨尺書遲遙知雨別風流後

直到秋高木落時  
負郭生涯千畝竹  
長年心事四愁詩  
與君家世如兄弟  
歲晚同爲丘壑期

次汪相韻

幾年東閣歎差池  
忽見溪山照紫微  
千里謹傳旌節至  
一城爭看錦衣歸  
敢言刺史分符寵  
幸遇諸生鼓瑟希  
早晚九重宣詔急  
紫陽山下驛塵飛

次韻張樂潛

從渠兒輩錯書聲  
自寫新詩細作行  
門外滿生書帶草  
林間知有德星堂  
流匙已厭青精滑  
蘸甲須嘗白墮香

祇恐笑談須此老又教天下起馮唐

次韻蔡天任二首

遠屏郊園誰復過支筇立到暮鐘時苦無啼鳥坐春去  
時見好山緣竹低行逢鄰僧語一則絕勝飲客呼三遲  
人間萬事不關我以鼓自遮如凍龜

一雨真成解人意翻盆注野卻晴時五更城上鳥烏樂  
十日街頭櫻笋低江聲卽隨潮信急雲氣欲度山椒遲  
吾徒飽飯眼中見鍊息不應長學龜

次韻董禹川二首

閑

江山怪我數能來  
政坐刀斤赦不才  
生理喜于魚得計  
交情羞似鴛爲媒  
烟塵回首烽三月  
花柳關情酒一杯  
日夜故園歸夢好  
憶衝細雨斲蒿萊

涉世真成百罅舟  
漫教俗子相壺丘  
投林老去三椽在  
墮甕年來萬事休  
只欲攜兒耕甫里  
誰能著酒換涼州  
絕憐揚子津頭雨  
管斷江南庾信愁

次韻洪駒父集東山

文書到眼只睽昏  
出郭尋山聊解紛  
驅馬去迎三丈日  
與僧同臥一牕雲  
竹間揮麈風相及  
松下烹茶手自分

回首微官堪底用他年泉石是知聞

晚發吳城山

風掃陽侯雪陣平雨催摩詰畫圖成  
氣吞浦溆重林盡秋著江湖去鳥明  
厚祿故人無一字長年三老伴餘生  
會須滿意開懷抱到眼廬山不世情

題何子應竹君軒

苔連深竹楚江干分與幽人宴坐看  
映得圖書終日翠妻成風雨未秋寒  
渭川昔漫誇千畝錦里今須種數竿  
移取辟疆園畔去免教童子報平安

開

次韻向君受感秋二首

且欲相隨苜蓿盤不須多問沐猴冠菊花有意浮杯酒  
桐葉無聲下井欄千里江山漁笛晚十年燈火客氈寒  
男兒幾許功名事華髮催人不少寬

向侯挂笏意千里肯爲俗彈頭上冠何時盛之青瑣闥  
妙語付以烏絲欄日邊人去鴈行斷江上秋高楓葉寒  
向來叔度儻公是一見使我窮愁寬

次韻熊使君登樓感秋之作

隨儂何物四經秋只有江南萬斛愁客枕蛩親聞最早

鄉書鴈少到無由菊叢今歲還經眼茅把何時得蓋頭  
工部也應兒女隔羨他相近水中鷗

小築成漫書

旅營茅屋破蒼苔隔水花多不用栽開卷古今千萬事  
杜門清濁兩三杯故人昔尙風相及客子今并雨不來  
已辦此身如木石沙禽那得更驚猜

用友人韻寄平江蔣侍郎

詞源袞袞患材多筆力駸駸跨永和屢閱州符猶剖竹  
盍歸禁橐舊持荷聲華大似城南杜勲業看如相國何

開

自笑萍踪久爲客那能綺麗盡餘波

書寧川驛壁

過眼空花一餉休坐狂猶得佐名州雖遭瀧吏嗤韓子  
卻喜溪神識柳侯盡日野田行穉稷有時雲嶠聽鉤輅  
會將新濯滄浪足踏遍千巖萬壑秋

余去年寄前詩今再過其地而彥征已卒用前韻

書驛壁

年少豈知身世浮心期同老故山秋誰教玉樹埋黃壤  
不許鴿原到白頭鼎鼎百年皆夢幻悠悠萬事判窮愁

當時鴻鴈書來處今日飄然成獨游

惱張子充

他州異縣復芳時疆起尋梅把一枝濁酒縱能于道近  
蒼髯終不與春宜逢人欲作媿隅語去國長爲僂句欺  
斟酒旅情誰會得徑須京兆出蛾眉

橫山堂

早冠清朝玉筍班忽乘歸興拂衣閒聊將詩酒關心地  
盡占江湖在眼山人坐數州空翠下月行萬頃水雲間  
當時范蠡曾知此那得扁舟去不還

開

分明圓嶠與方壺萬壑千巖入坐隅臨賦競傳今日句  
臥遊安用昔人圖丹青霜葉秋明滅水墨烟林暮有無  
記取滄浪漁笛曲他年要將使君鬚

靈惠公廟

臺殿崇崇冠冢顛行人跪起白雲邊山河霸業三千里  
歌舞靈衣五百年鐵馬威神通異域袞龍書命降中天  
偃王遺種班班在好乞韓碑記邈縣宣歙間有主嶺靈  
惠公廟存焉惠公  
余祖也隋末有宣歙之最本朝以陰兵佐  
邊錫今封余通守宣城故用韓碑故事

醉別劉季高侍郎

疇昔追隨翰墨場功名今日愧劉郎  
英姿合上凌烟閣巧譖曾遭偃月堂  
雙槳又乘清夜去一尊聊發少年狂  
歸來卻共燈花語騎省看成滿鏡霜

移守臨川曾吉甫以詩見寄次韻答之時吉甫除  
閩漕未行

朝來剝啄叩門誰昨夜燈花已報知  
腰下方懸新守印眼中已見故人詩  
十年且喜朋簪合千里休言官牒隨  
問我抽書何日竟病來編簡網蛛絲

送杜文仲微赴山陽倅

開

城外長淮綠渺瀰此行聊復鴈門騎邊烽已息何妨醉  
民訟全稀尚可詩昭代聲名方此振中年離別未須悲  
溧陽老尉還天幸政自扳援得退之

奉送張彥良司理

病來誰復顧湘纍君獨無忘宿昔時人物喜逢三語掾  
風騷遠過四愁詩尊前破涕方成笑人事多乖又語離  
莫道天涯無鴈到好風寧不寄相思

重送惟皓

那知重到舊溪邊兩月青燈聽雨眠閒引瘦筇行落葉

復尋清磬度疎煙宦遊南北夢千里人世短長癡百年  
安得隨君飛鳥去盤陀相對共安禪

喜汪發之見訪并簡婺源江明府

怪底青燈綴玉蟲忽傳車馬到溪東鳥聲應爲故人好  
梨雪欲將春事空老去淵明三徑在病來彌勒一龕同  
總持相見問生死爲報百憂如夢中

約教授遊東林寺

擾擾塵勞懶曳裾此生終待老匡廬兩山分破吟難盡  
一水飛來畫不如紅杏成壇今髣髴白蓮結社漫躊躇

開

泮宮夫子能敦約共採新聞廣舊書

熊使君次韻見屬次韻答之

蠻縣三年喜及瓜歸歟春思自無涯朝陽巖上無殘雪  
慶朔堂前已亂花歸到兒曹應借問爲言顛髮未全華  
仲宣正得依投處萬里心安卽是家

寄呈壽基致政左司

年來何事憶蓴鱸家近秋風萬頃湖五馬曾同當日渡  
二疏今見古人圖山靈尙勒移文否田父時遭泥飲無  
餘論不妨傳四海君家世世有潛夫

拂衣歸憩舊烟蘿鐘鼎山林竟孰多眼看空花皆是幻  
心同古井肯重波清談三尺竹如意宴坐一枝松養和  
我亦行拋簪笏去從君春日曬漁蓑

戲孫仲益暮春自尚書郎予告迎婦澗東留毗陵  
久之

尊酒相逢禊飲初花飛柳暗忽春餘不嗔太史牛馬走  
許醉郎官櫻筍廚幸有雪兒歌妙句何妨雲液載行車  
只愁人誤刀頭約新月娟娟已鏡如

次韻張閔道西池小集

開

眼中烟水復雲林地勝身閒得細尋沙暖鳧鷗渾得意  
日長桃李自成陰風光欲盡今餘幾杯酒相逢莫厭深  
報答春江無好語浪陪諸彥恣窺臨

次韻吳子書天寧夜集

子書先協名士也

萬卷長年坐一窻肯論丘壑與巖廊江頭同過楝花節  
夜半劇談獅子牀異世風流相廷祖他年言語傳君房  
菰蒲渺渺但烟雨何意眼中逢此郎

同辯良至薦福塔頭

曉尋幽處一牛鳴空霧依迷失化城茗椀薰爐重問訊

竹溪松塢共經行  
雲昏洲渚雨還作  
風入菰蒲潮欲生  
此地相逢復相別  
江天病眼向誰明

翁養源因先冢瑞松作亭求詩

穆枝偃蓋蔚相扶  
絕勝分封五大夫  
天遣歲寒雙幹合  
人言江左百城無  
聞孫爲表祠叢勝  
好事爭傳宰樹圖  
肯學并柯桃與李  
四時佳色照黃壚

過寧國小嶺

步歷崔嵬數百尋  
垂堂漫許戒千金  
年來世事總如夢  
老去兒曹長掛心  
聽雨不眠那夜永  
行山未遍忽秋深

天寒更度宛陵水霜月欲生風滿林

東安許明府同里之親任滿回家求詩爲別卽席  
賦此兼簡熊使君

三載相依葛與瓜一尊爲別忽天涯君先歸路經回鴈  
我正幽棲似浣花好去乘時追俊彥莫嘆無力薦才華  
城中若見漁樵客須問浮溪老圃家

沐中偶題

蜻蜓斜日立簾鉤燕子新晴語柁樓熠熠晚花隨意得  
茫茫春水此生浮無官可緩三人帶有子能勝十具牛

老大拂衣歸去好，尊鱸何必待清秋。

過金陵

六代興亡迹愈陳，迹陳誰遣意如新。  
古今更欲悲何事，天地長留景似人。  
雲壓山低惟妬晚，霧蟠江闊更含春。  
固知到此無窮感，豈獨區區我一身。

傅冲益久不得書

經年坐久一蒲團，幽鳥時呼到曲欄。  
山色總兼溪色好，松聲長學雨聲寒。  
那將俗物關心事，只擬晴牕想鼻端。  
已作生涯蠶事老，故人誰肯報平安。

開

次韻孫國器喜予鈔書精密

天教江海著潛郎擬作他年柱下藏未辨壁書摹古漆  
聊將閣本寫官黃苦心便擬耽成癖病眼猶堪細作行  
祇恐雌霓成誤讀更須頻訪沈東陽

還吳禹功徐帖

誰專小學國朝初籍籍甘泉數二徐輩行雖居騎曹後  
典刑全是嶧山餘柳家莫笑薑芽手鄭老方耽柿葉書  
待得門前溪水黑憑看合作定何如

朱新仲自韶州寄靈壽杖并詩次韻答之

苔漬嵐侵幾百秋詩仙寄我海南州攜來應自滇池國  
得處還因博望侯吹燭會尋延閣老掛錢肯學飲家流  
杖兮莫便爲龍去扶取衰翁老故丘

題四望亭

累棟層軒縹緲間碧虛相照水精寒縱橫盡得江山勝  
俯仰方知宇宙寬千里風烟環廣座四時星斗轉危欄  
何須更盡東平障十萬人家表裏看

簡蔡天任

寂寂閒庭少客過翛然丈室一維摩腦脂遮眼空豪在

閑

藥裏關心奈老何  
雨後書連脩竹翠  
夜深床繞候蟲歌  
東鄰似最知人意  
合有新詩到薜蘿

熊使君次韻

萬石亭西半是苔  
舊時官柳著行栽  
使君爲築溪邊屋  
野老同傾月下杯  
好在一廛從此記  
休論三徑有誰來  
會須便作漁梁去  
莫遣鷓鴣忽見猜

和家叔春日

曉看春水滿方塘  
靜掩柴扉白日長  
花意風光空爛漫  
客愁山色對蒼茫  
揚州歌吹今何在  
陶令田園亦就荒

試問南來米貴賤欲隨春浪過瀟湘

挽留二兄

聞挈囊衣指故林上堂長跪涕沾襟肯將斷鴈相望影  
來慰驚波未定心客路山川方積雪吾廬桃李久成陰  
歸鞍底用匆匆發更促杯盤語夜深

嘲人買妾而病二首

但知瓊樹鬪清新不道三彭捷有神處仲未聞開閤事  
維摩空對問禪人封侯燕領何妨瘦伐性蛾眉卻怕顰  
從此空花掃除盡定須嚼蠟向橫陳

開  
u

何須天氣水邊新便好尊前賦洛神定自中年多作惡  
非關尤物解移人莫愁阿鶯煩君嫁且學西施爲我顰  
爭似農家無一事從來婚嫁只朱陳

德邵親迎而歸乃有打包辟穀之興以詩見貽戲

用其韻

解事無人似樂天玉簪舊語世相傳打包就使從前話  
彈指安能斷後緣寂寂空房惟法喜茫茫何處問臞仙  
冬之夜永宜長慮百計真從若箇邊

詠菊

依倚西風不自持  
葳蕤羽葆雜金規  
繁開不負朝陽色  
獨步非關昊帝私  
把酒可能追靖節  
掇苗終欲慕天隨  
春紅過盡聊經眼  
賴有芬菲慰所思

題止戈堂

此老胸中百萬兵  
暫勞試手沸狼羣  
山頭不復望廷尉  
柱後何須用惠文  
解帶爲城聊戲劇  
賣刀買犢便耕耘  
三山勝處開華屋  
千載人傳舊使君

千里聞山駟騎飛  
天書趣解海邊圍  
異軍方逐蒼頭起  
元帥徐將白羽揮  
翻就饒歌春舉酒  
收還烽火夜開扉

開

向來萬事關兵氣都作風光坐上歸

郊丘書事

琅輿深出未央門十里園壇氣象尊  
珪璧三千周典備  
貔貅百萬漢兵屯  
青城浮靄連霜動  
黃道微風帶日溫  
不用靈光符聖武  
從來精禋答乾坤

題至樂堂

倚空危榭壓城樓十里風烟攝寸眸  
二華忽從天外落  
三河直入坐中流  
何人解得爲邦樂  
有客難甘去國愁  
投老復來江漢外  
此生歸計日悠悠

題僧罄宜枝巢

平生到處覓三椽  
白首歸來古刹顛  
飛錫幾逢花雨地  
住山今得鳥窠禪  
九霄鵬翼心雖在  
萬壑松風夢自圓  
莫笑維摩方丈室  
會看遊戲著人天

禪月羅漢

扁鎖收傳古聖師  
飛揚不類虎頭癡  
槎枒老木垂雲蔓  
偃僂胡僧拖雪眉  
丹墨已隨嵐靄盡  
精神猶作電光馳  
祇應夢乞歸巖寺  
要使邦人習氣移

送僧還山

開

傳得清涼祖佛衣來新震澤舊禪扉幾年香木成林種  
一日孤雲帶雨歸別路片帆方蕩漾名山八部已光輝  
夜牕時得伽陀句會寄江城秋鴈飛

送廷藻兼呈楚州通守杜丈

相從嘗恨十年遲握手匆匆每自疑風艇煙帆還此日  
隙煙籬井定何時試看子學猶難售須信吾窮未易醫  
千里同風杜夫子可能時寄彈丸詩

過梅田追傷胡公立寄其姪仲平

繫船還共竹林居憶昨盃行手挽蔬滿眼誰同春夢事

經年不枉故人書木奴封戶千頭橘雪片傾箱二寸魚  
信美湖湘異吾土且尋烟艇意何如

致政王參政挽詩二首

直道行藏世所難拂衣談笑便休官逢時合上麒麟閣  
執法先栽獬豸冠兩國旌壇交境外三年帷幄侍朝端  
龐眉未向清時老萬事浮雲忽蓋棺

賜第崇寧一再春建炎方識老成人早爲勇退山林士  
晚作中興社稷臣手把青箱傳後裔日陪黃閣轉洪鈞  
鄉關間闊雖千里松檟相望亦海濱

關

挽刑部王侍郎詩二首

詔蹕南來首賜環清名誰不仰高山獨操廷尉平反柄  
徐步文昌侍從班曾子哀矜情得後臯陶明允罪疑間  
中朝正賴公持議那得超然便不還

滿朝忠恕更誰知家有西京小杜書揚子清貧安甌石  
于公陰德大門閭雖嗟平進騫騰晚正值中興選擢初  
遺直至今談未已故知人不數曹蜍

湖南安撫劉龍圖挽詞二首

胸次光風霽月明論文袞袞九河傾一辭天上金鑿直

再見湘南竹馬迎梁相合圖煙閣上鄭公忽去雪山輕  
眼看過棹呱呱泣誰謂衡州浪得名

前年旌節駐江湄始向清揚識紫芝名繫南陬朱鳥影  
官兼東觀白雲司初驚楚俗招魂些已見羊公墮淚碑  
千古風流鍾嶺嶠湘人應配曲江祠

張徽猷挽詩二首

家有平津舊學傳人材嘉祐至和前運籌慣倚將軍樹  
畫諾頻分刺史天字得鍾王真楷法心超粲可祖師禪  
零陵宴寢公重到父老追思靜治年

開

天與精忠伯仲間功成公獨拂衣閒專城早應賢侯選  
延閣榮聯近侍班去國久違龍尾道思鄉長夢鹿頭關  
談經盡日摳衣處學子相逢淚雨潛

廣川夫人挽詩二首

董彛待  
制母

壺範閨風照里閭來嬪文伯薦牢蔬眼看再世登詞掖  
身得三朝錫命書忽報孟軻陳後鼎漫勞潘岳賦閒居  
遙知京兆新阡上千兩爭看會葬車

秋風一夕實庭萱無復春歸壽母門修墓已將徵在合  
渡江猶喜伯仁存早爲舉案齊眉婦晚見扶牀坐膝孫

全福了無毫髮恨始知陰德自平反

賈太夫人王氏挽詩二首

賈讜寶  
學母

優恩不與外庭同詔墨親頒出九重鐘鼎承家能兩大

詩書教子得三從葭苒密接椒房慶脂澤頻增石窠封

千里歸來鳴鶴野湘江正繞墓前松

憶昨容衣未耐姑哀深反哺白頭烏佳城欲見千年日

旅殯先求五父衢汲汲素冠蒙霧雨翩翩丹旄歷江湖

竟成窀穸干戈後此事哀榮世所無

挽靖安縣君

開

五世傳家德有徽更嬪蕭史慕靈妃平生未足魚軒樂  
故里空傷羽翼歸雌劍忽先收夜氣寸菱猶欲報春暉  
自慚不就磨笄志尙在徒能淚滿衣

浮溪集卷三十一

開化圖書館  
Kaihua Library

浮溪集卷三十二

宋

汪

藻

撰

五言排律

龜山上方

度險逢幽處，憑誰寫壯懷。  
連甍棲絕壁，孤塔表長淮。  
地本吳楓接，山今禹績皆。  
潮聲遙入寺，竹影自翻階。  
木杪朱欄出，城垣雪浪埋。  
乾坤迷枉渚，霧雨泄陰崖。  
丹葉經寒在，蒼洲向晚佳。  
魚龍宵聽唳，猿鳥晝窺齋。  
月滿蟾珠實，霜清磨石諧。  
僧孟收柏子，樵徑埽松釵。  
左宦書無鴈

南烹菜有鮭風煙欺短髮雲水信殘骸竟作何鄉老虛  
慚素尚乖江湖今在眼歸合辦青鞋

壽建安郡王

氣協高秋爽祥開寶胄華從今丹府籍爲瑞帝王家桂  
滿前宵影桃舒浩劫花德參龍種後班次雁行斜早賜  
真王策榮膺上將牙兔園宏建敞貂冕異恩加仙掌高  
承露天潢穩泛槎漢邦傳異慶周篚拜親嘉永接宗枝  
秀同符玉歷賒喬松千載壽他日看肩差

壽俞少宰

開

閩海羣仙地商秋少昊辰盡哀山嶽氣來作廟堂身秀  
拔千尋玉羣開一角磨早年提巨筆平步歷通津當宁  
欣前席同時歎絕塵鱣堂初簡拔烏府卽騰掀旋綜天  
官要還躋政路親南臺沙磧合兩省袞衣新金鼎功名  
會紗籠富貴人房籌須杜決蕭畫賴曹遵畎畝家蒙福  
圖書日效珍百城收唾手萬事斷垂紳皎皎胸中鑑融  
融筆底春羣工推靖密舉世服清真直宿非箕斗逢時  
實渭莘帝嘉忠力久朝羨寵光頻申伯詩方績桓榮賜  
已陳露清龜食息霜老鶴精神永世承元首中天轉大

鈞歲留稱壽筭旬日看車輪

上蔡太師生辰二首

萬古儲英氣生賢鎮廟祧方春回暖律隨帝下神霄早  
歲陪興運清忠服邇僚三篇俱命說兩絕獨承堯爲國  
隆堂陞中天幹斗杓光華歸使牒寧謐載民謠九牧金  
成鼎三山石峙橋元圭來舊錫神寶獻新雕堂起房心  
次音諧甬徵韶車書人一統符瑞歲千條璧海材逾盛  
沙場敵不驕獻琛皆累譯入殼有垂髫郭解雙封國班  
超五日朝嘉謀從昔合奕業更誰昭眷禮羣臣異恩光

開

此日饒授圖開地壯傍闕築堤遙供帳移金屋歌鐘實  
綺寮名園藏茂密華閣聳岩嶢詔蹕紆臨幸宸毫紀宴  
招弟兄聯袂繡孫子列蟬貂印琢金爲彩魚懸玉在腰  
中姻連築沁外族綴塗椒帝子傳杯酌宮牆有鼓簫果  
新無獨享羹美或親調

宇宙將昭泰風雲必會同帝師黃閣老人羨黑頭公慶  
節同堯歷新陽應嶰筩儀韶來彩鳳占夢得真熊壽考  
天資魯神靈嶽降嵩曲儀尊赤舄歌詠美彤弓夷險無  
殊節誠明信保躬濟川先衆楫遵渚集飛鴻炳炳丹青

筆堂堂社稷忠斗杓還列宿廉陛倚層穹文武俱爲憲  
詩書孰比隆規模三代遠謀略萬夫雄字畫諸王品文  
章兩漢風早登青瑣闥頻入紫微宮器敏無餘刃才豪  
妙吐虹聲光連日月氣概俯華戎天上經綸合人間制  
作工向來凝庶績誰復簡清衷絃誦三雍富舟車四海  
通地歸銅柱北春滿玉關東養士菁莪盛論才駿馬空  
聖時方密勿賢業助昭融螭紐乾符正龍文帝聽崇伊  
湯咸有德房杜不言功禮秩羣臣異恩波比日豐宸章  
頒琬琰相第列帡幪東壁文昭爛西崑氣鬱葱節旄藏

開

藻戟茅土啓龜蒙  
裘繡卿雲裏貂蟬瑞  
藹中御奩金寶  
帶神廐玉花驄  
蓬島波全闊天鈞樂未終  
禁香紛縹緲  
朝佩雜玲瓏芝草盈田  
紫蟠桃照海紅後彫凝秀髮難  
老湛方瞳冰質期姑射丹砂喚葛洪  
潛機神宇定睟表  
德符充瑞鶴千年羽靈著五色叢  
舊傳調鼎客今識鈞  
璜翁世世聯台衮年年拱帝聰  
欲知耆算永元氣等無窮

哭尙書龍學程公

名瑀

江左推人物時清得俊髦  
肺肝傾耿介頭角長英豪  
鄉

郡賓興最賢關譽望高萬夫爭射鵠一舉獨連鰲經術  
爭儒館詞章重省曹主憂俄旰食邦禍始秋毫疆寇來  
侵逼敷天徧繹騷奮身攄憤懣銜命使腥臊深入邊亭  
隧堅持漢節毛道途千里隔忠義寸心牢歸報龍顏喜  
親聞鳳詔褒功成侔李郭政合付伊臯超擢陞青瑣謀  
謨拱赭袍百官瞻矩矱八座次甄陶晚歲猶持橐鄰州  
暫夢刀台星方兩兩逝水忽滔滔上意長圖舊朝廷未  
閔勞謝安幾一起秦失卻三號伊昔身遐謫公時首屢  
搔交情如骨肉仕路正風濤里閨期重會泉臺恨莫逃

開

終天吁永訣  
雨淚滴香醪

五言絕句

知非齋

其是果安在  
況今非故吾  
箇中惟醉好  
莫忘黃公壚

愛閔齋

竿木逢場處  
何人肯自還  
祇應韓吏部  
能道不如閒

光風橋

茂林脩竹下  
一水獨縈回  
時過赤欄去  
風從蘋末來

飯牛庵

相從龍具中耕稼亦吾學所求一飽同安用瑩蹄角

臨賦閣

與物相忘久于何寄此情祇應逢勝會不覺句還成

次韻吳明叟集鶴林五首

平生夢往處始到天南峯風來荷氣度日轉松陰重  
林間煮茗罷谷口蒼煙漫行看草根露已作珠璣團  
臨分更攜手坐聽烟鐘聲斜陽有底急不貸四牕明  
支頭澗底石濯足松下泉吾生儻有此無復東西緣  
冥冥近嶺翠瀏瀏長廊風他年竹林社記取山王同

開  
u a

北牕

睡起無一事怡然盼庭柯  
綠陰微缺處最得南颺多

題松竹圖

清霜搖落後賴此慰詩翁  
借有茱萸泝風流可得同

戲題寂庵

是心長不起宴坐一團蒲  
安得龍眠手添成憩寂圖

題商樂亭

趣收霜後實供我洞庭春  
未暇三百顆作書懷故人

偶成

幽臥一禪榻無人共白雲山泉與溪水偏遣夜深聞

六言絕句

舟行三首

摩詰畫中平遠庾郎句裏清新有底江山面目年來到處相親

水底藻迷淡曉樹頭葉振凋年未許梅懸玉乳先教橘  
喫冰泉

山水俱含古色煙雲巧發天藏乞與詩人醉眼要令彈  
壓秋光

七言絕句

題張資政汝川圖九首

昔人曾此結精廬故老猶存井臼餘  
今代子房來卜築  
要看圯上一編書

右澹巖書堂

湖潭千尺見脩鱗倚杖時觀鏡裏身  
汝輩只堪箋爾雅  
騎鯨那識謫仙人

右泊湖潭

發揮泉石有新圖西蜀墓頤得爾無  
斲作釣璜谿上客

谿神何必問賢愚

右蝦蟇石

每尋疎磬訪支郎  
松竹交陰杖屨傍  
絲履氎巾聊取用  
風流不減贊公房

右多寶院

花光連接兩臺春  
中有眠雲跂石人  
莫使鞭笞鸞鳳去  
時來重現宰官身

右金石臺

年年春色報公知  
不與天涯驛使期  
我是平章風物主

開

可知東閣見君時

右梅僊潭

履綦行處日蒼苔  
攀悅深藏月一開  
已辦此身同法喜  
不應臨感更難裁

右懷賢庵

直到孤峯最上頭  
下看雙澗玉虹流  
世間培塿何須數  
且臥元龍百尺樓

右積翠樓

蕭散香山與輞川  
功名綠野及平泉  
有田種秫供春醉

五柳先生似更賢

右甘陂莊

次韻胡德輝乞予鈔書之副六首

蠅頭于我已無緣  
拈問東家不直錢  
乞與中庸胡伯始  
免教堆屋篆蝸涎

爾來書史鈍如鎚  
安用牙籤萬軸爲  
遣我牀頭周易去  
憑君分取半生癡

欲鑽故紙出何緣  
大似兒啼業作錢  
我已捐書覓三昧  
怪君舊著野狐涎

開  
ka

長年朱墨明窗下自笑膏肓不可爲賣菜區區苦求益  
君房他日更應癡

五車政自妨人樂祇合鑿供餉鬼錢我有靈編端欲見  
爲君掃地注龍涎

長檠計出羣兒下兩眼眇昏欲底爲憑語少年須著便  
酒狂端合信書癡

漫興二首

晨起翛然曳杖行一簾疎雨作秋清老來歲月能多少  
看得栽花結子成

燕子年年入戶飛  
向人無是亦無非  
來春強健還相見  
送汝將雛又一歸

醉書

尊前和雨唱陽關  
紅燭熒熒照夜闌  
酒醒夢回山月小  
水雲無際鴈聲寒

將至郡城

花姑溪上問歸舟  
謝守城邊識小樓  
兩岸垂垂秋色老  
渡頭人更老于秋

熊使君垂和用元韻答之四首

憑軒時見白雲行  
霜入長江萬丈青  
逐客今年緣底事  
村村簫鼓報秋成

新亭雖小亦翬飛  
陡覺風烟與昨非  
分得使君秋數頃  
登山臨水送將歸

閉門多睡少經行  
隨分匏尊瀉濁清  
庭下若生書帶草  
前身卽是鄭康成

兒時也羨刺天飛  
投老方知絕百非  
酬唱恰成劉與白  
分司且住莫言歸

題江南春曉圖

忽從林杪見朝暉  
濕嶠輕雲半欲飛  
何惜扁舟并畫我  
要從沙際望春歸

贈人二首

聞將衲子日尋幽  
度水穿雲處處游  
遙想逃禪時一醉  
人間春甕與扶頭

山城重到轉清幽  
勝日閒尋舊釣游  
定是沙鷗嫌俗駕  
背人飛去不回頭

次零陵太守競秀堂韻四首

層巒遠近翠浮空  
人道山川似剡中  
正要瀟湘含遠色

開

莫教江上起樵風

柳子當年亦好奇  
衡陽叢桂手親移  
何如此地栽桃李  
春到千巖萬壑知

從渠歌舞轉頭空  
且索尊前一笑同  
欲識使君真樂處  
蒲團禪板是家風

桃花拈出白靈雲  
薦得伽陀獨有君  
無事時來觀物化  
妙高峯頂度朝曛

次韻周聖舉四首

斗酒相逢且緩觴  
惜無妙曲惱周郎  
願吹江水添杯杓

不管春秋似許長

滿眼睛江濫不收浴  
鳧飛鷺迴相儔何須細話興亡事  
今古從來貉一丘

棄甲高于熊耳山大弔挂壁更須彎  
從今江北江南柳莫遣行人取次攀

少婦中宵聞馬嘶曉看黃色上脩眉  
男兒一爲功名死肯向空山愁秭歸

次韻蔡天任十首

江頭山色舊所愛倒影玉海空  
嶙峋爾來處處作媚嫵

開  
u a

似與世爭眉黛新

幽人午枕夢清熟書筆滿牀花自開兒童誤起聽脩竹  
舊雨故人今不來

我家君家一牛鳴相見幾何今露螢要須來往成白首  
痛飲共讀離騷經

江南六月底風土十日市無山鞠窮不應梅子趁時節  
自是國人愁寓公

君家食指如堵牆不著斗酒求西京門前糶種三百畝  
勝我筆耕無寸秧

關西老將爭捐軀，帳下健兒思草枯。  
誰能捐粟百萬斛，乞與繞樹南飛鳥。

山中種橘無千頭，一飽未卜爲君憂。  
長年有飯卽吾土，問米貴賤還東流。

脩廊過午夕陰合，蝴蝶滿庭春草長。  
呼兒更卷簾數尺，要放晚晴升屋梁。

百年都盧能幾日，況迫晡晚行歸休。  
高車列鼎豈非欲，安步晚食差無憂。

中郎故是渥洼種，不受世人金絡頭。  
十年一衲作僧過。

關  
ka

臥看煙雨明沙鷗

萬上人將游三吳袖杼山居士贈言見過戲成兩  
絕送之

參得湯休五字禪一餅一鉢去飄然定知游歷名山徧  
吟入江湖萬頃天

韓子由來未識真欲還澄觀作詩人若教早被儒冠誤  
那得雲山自在身

還璉上人詩卷

筆端遊戲詎須頻短軸才開卽可人月映澄江梅映雪

比君猶自未清新

或傳有歸期陳時發餉靈壽杖求詩

聖恩端許返柴荆便合踟躕過此生九節煩君持送似  
人間險處不重行

銀毫

玉爲蟾蜍冰作滴烏絲欄開寶鴉墨天孫夜拾瑤草歸  
醉舞銀毫鬪春碧

卽事二首

燕子將雛語夏深綠槐庭院不多陰西牕一雨無人見

展盡芭蕉數尺心

雙鷺能忙翻白雪  
平疇許遠漲清波  
鉤簾百頃風煙上  
臥看青雲載雨過

雜詩

古屋清寒雪未消  
小牕晴日展芭蕉  
酸甘荔子清醇酒  
更展青芽薦菊苗  
碧牕涼簟惟便睡  
露井無塵蔭綠槐  
夢入醉鄉猶病渴  
轆轤聲到枕邊來

枯禪

我行昔到虎溪頭俗氣浮光兩無盡當時獨指煙樹杪  
有士枯禪雪侵鬢

浴孫日熊叔雅有詩次其韻二首

休論臭腐與神奇康樂還生謝客兒我有浮溪農圃在  
他年分付小樊遲

釋氏夢中親抱送人言價重百車渠阮家新婦得雄帖  
還有數行中令書

夜雨遣興

風雨鳴窓報客知還孤月底探梅期泉聲猶自斷還續

開  
ka

遙想棲禽無定枝

宿鄴侯鎮

當時踏月此長亭  
鬢似河堤柳色青  
今日重來堤樹老  
一簪華髮載寒星  
微涼初破候蟲秋  
水露草螢光不流  
搔首與誰論往事  
星河無語下城頭

次韻何子應七月十八日書事二首

寄語江鷗莫浪猜  
先生愛汝水洞洄  
自從楚國靈均後  
幾箇騷人到此來

臥看山色懶扶輿擬權扁舟學釣魚誰似湘流知我意  
秋來三得道州書

詞

點絳脣

新月涓涓夜寒江靜山銜斗起來搔首梅影橫牕瘦○  
好箇霜天閒卻傳杯手君知否亂鴉啼後歸興濃如酒

前調

高柳蟬嘶採菱歌斷秋風起晚雲如髻湖上山橫翠○  
簾捲西樓過雨涼生袂天如水畫樓十二有箇人同倚

開

ka

小重山

月下潮生紅蓼汀殘霞都斂盡四山青柳梢風急墮流  
螢隨波去點點亂寒星○別語記丁寧如今能間隔幾  
長亭夜來秋氣入銀屏梧桐雨還恨不同聽

浮溪集卷三十二

開化圖書館  
Kachua Library

開化圖書館

Kaichua library

開化圖書館

開化圖書館

Kaichua library

紅印

開化圖書館

Kaichua Library

開化圖書館

Wakuhwa Library

Blue Cyan Green Yellow Red Magenta White 3/Color


© The Tiffen Company, 2007

TIFFEN Color Control Patches

Centimetres

1 2 3 4 5 6 7 8 9 10 11 12 13 14 15 16 17  
1 2 3 4 5 6 7

Inches



浮  
溪  
集  
八

開  
化  
圖  
書  
館  
Kashua Library

開化圖書

Kaishwa Library



Inches

1

2

3

4

5

6

7

1

2

3

4

5

6

7

8

9

10

11

12

13

14

15

16

17

Centimetres

**TIFFEN** Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color